

Siunnersuut uunga: Suliniutini angisuuni illuliortiternernik sanaartornernillu suliassat pillugit Inatsisartut inatsisaat nr. 25, 18. december 2012-imeersup allanngortinnissaa pillugu Inatsisartut inatsisaat nr. xx, yy 2013-imeersoq (suliniutinut angisuunut inatsit)
(Inuussutissarsiornermut Aatsitassaqaqarnermullu Naalakkersuisoq)

Akissutitut allakkiaq

(Inuussutissarsiornermut Aatsitassaqaqarnermullu Naalakkersuisoq)

Aappassaaneerera

Inuussutissarsiornermut Ataatsimiititaliap ilaasortaasa suliannut aamma isumaliutissiissutaanut Naalakkersuisut qujapput.

Maannakkut siamasissumik politikkikkut tapersorneqartumik suliniutinut angisuunut inatsisip ilusilersuisimanerput, taamaattumillu nunatsinni aatsitassanik suliniutinut aningaasaliisartut atasuusussatut naatsorsuutigisinnaasannik peqalernerput pingaartuuvoq.

Aatsitassarsiorfiusup aallartinneqarnissaa pisariaqartipparput, assersuutigalugulu Isuani suliniummut atatillugu sulisorpassuarnik pisariaqartitassanik pilersugaqarsinnaanngilagut.

Suliniutip sanaartornerata nalaani sulisartunik tikisitsinissamik suliniutinut angisuunut inatsit periarfissiivoq, tamannalu ilutigalugu sulisartut atugarisassaannut sinaakkusersuilluni. Suliniutinut angisuunut inatsisip aamma nunanut aatsitassarsiorfiusunut allanut naleqqiullugu Kalaallit Nunaat unammillernerulersinnaatilerpaa, inatsit aatsitassarsiorluni suliniummik angisuumik sanaartornerup nalaanut atatillugu aningaasartuutunik annikillisiaaqataammat.

Ataatsimiititaliaq allannguutissatut siunnersuummik, inatsimmut siunertanik tapersersuisumik saqqummiussisimavoq, taamaattumillu taamatut oqaaseqarlunga siunnersuutip aammalu siunnersuummut allannguutissatut siunnersuut akuersissutigisassanngorlugu innersuussutigissavara.